



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

***Komunikadu Imprensa  
Parlamentu Nasionál  
9 Abril 2015***

**Parlamentu Nasionál Aprova Orsamentu Jerál Estadu Ratifikativu 2015 ho Unanimidade**

Iha Tersa-Feira 07 Abril 2015, liuhusi reuniaun Plenária Parlamentu Nasionál, deputadu sira continua hala’o diskusaun no votasaun iha esepesialidade nomós votasaun finál globál ba Proposta Lei Nú. 18/III (3ª)– Primeira Alterasaun ba Lei Nú. 6/2014, 30 Dezembru kona-ba “Aprovasaun Orsamentu Jerál Estadu ba tinan 2015”.

Durante diskusaun esepesialidade lora rua; iha 6-7 Abril 2015, deputadu sira subliña preokupasaun barak ne’ebé governu persiza hadi’a mak hanesan sistema administrasaun públika, efektividade ba kontrolu ezekusaun orsamentu, hasa’e rendimentu povu, inklui kria kampu servisu. Parlamentu Nasionál mós ejizé kualidade ezekusaun orsamentu hosi VI Governu Konstitusionál ba tinan 2015.

“JSMP husu ba VI Governu Konstitusionál atu hadi’a prestasaun no kualidade servisu ho orsamentu ne’ebé aprova no aloka ona ba setór prinsipál sira, atu nune’e bele hadi’a povu nia moris,” dehan Diretór Ezekutivu JSMP, Luis de Oliveira Sampaio.

JSMP mós sujére ba deputadu sira atu continua halo fiskalizasaun ba servisu governu nian ho rigór, hodi nune’e bele asigura efektividade no efikasias iha setór públiku ho nune’e bele garantia kualidade dezvoltimentu.

Total despeza Orsamentu Jerál Estadu Ratifikativu ba tinan 2015 millaun US\$. 1.570,000. Orsamentu ratifikativu ne’e fahe ba kategoria sira mak hanesan saláriu no vensimentu millaun US\$ 177,538, bens no servisu millaun US\$. 515,724, transferensia públika millaun US\$ 454,452, kapital minór millaun US\$ 31,004 nomós kapital dezvoltimentu millaun US\$ 391,283.

Aprovasaun Orsamentu Jerál Estadu Ratifikativu ba tinan 2015 ho unanimidade ho total deputadu 64 ne’ebé presente. Dinamika votasaun unanimidade ne’e tuir JSMP nia koñesementu ne’e akontese ba dala 5 ona, ne’ebé inisialmente hahu iha diskusaun Orsamentu Jerál Estadu Ratifikativu iha tinan 2012, no Orsamentu Jerál Estadu 2013, 2014, inklui Orsamentu Ratifikativu 2015 nian.

JSMP hein katak mesmu partidu politiku sira hamutuk lian ida deit atu vota unanimidade ba proposta Orsamentu Ratifikativu hirak ne’e, maibe papél hanesan partidu opozisaun la bele lakon

iha Parlamentu Nasionál. Tanba papél opozisaun ne'e importante tebes iha prosesu demokrasia liu-liu iha kontestu Timor-Leste ne'ebé nia demokrasia sei nurak hela.

Atu hetan informasaun kle'an liu tan favor kontaktu:

Luis de Oliveira Sampaio  
Diretór Ezekutivu JSMP  
Email : [luis@jsmp.minihub.org](mailto:luis@jsmp.minihub.org)  
Telefone: 3323883 |77295795